

L' guèrnouye ki s' vèyéve dèdjà boû.

Ène corète a vèyu s'pachi
trèvauchî pa in boû;
Ène bén bèle blan-bleuwe
bièsse, tote è tchaûr,
Boune, a-t-èle pinsé, a sins
mau satchî on loûrd tchaûr.
Lèye, ossi spèsse k'd'on
cizèt l' oû,
S'a volu infler è ravalant s'
n' alinne.

Èle ahanne, sofèle...oû, oû,
oû.. wêt-doû,
Èle pouÛsse a s' è fé pèter
sès vinnes.

Adon, s' djoke è dimande à
ène ôte guèrnouye :

“Seu-dj’ divneuwe ossi
grosse ki li? – Dès couyes !
Poussèz pus fwârt ! -
Mppfff-chofe, èt asteûre ? -
V’n’î èstèz nin co !

C’èst po l’ mwins chîj cints
kulos ki mankenut co !

Èt l’ ôte ki pompe èt
racapompe, i-v’faut lî vîre
sès massales,

Toûner nwâres violètes
come lès cènes d’ ène vîye
macrale.

Tot d’ ène trake, bardaf,
v’la k’èle pète.

È mile bokèts d’ rikètes èle
sikète !

Bransmint d’ doûs inocints,
tot parêy ont mau toûné.

Po ièsse rinnètes i s’ont
amwinrnés mins i s’vêyîne
tofêr bén mia è boû.

Èstèz v’nu au monde po
ièsse côrète,

Gonfèlèz-v’, inflèz-v’, fyoze
come vos l’voloz, vos fèroz
bèrwète,

Èt n’ritchêroz au mia k’ dins
vosse bèrdouye.

(A l’ après dèl Fontinne)

ÈT RIK ÈT RAK L’ BUSH VOUT SKÈTER



L’IRAK

ÈT RAK ÈT RIK ON NOS TOUNE È BOURIKES !

Lès wêteus d’ l’ ONU n’
ont co rin vèyu. Èsse ki leû
maÛsse-mwirneu racuzète
va nos douvièt l’ uch à ène
BLIX-KRÎG ?

*

D’après lès cias, lès
prèvisionisses, ki vèyenu
lon dins lès cautes èt lès
boles di vêre, si l’ bate èt
coûte, mwinsse d’ chîj
samwinnes, ça va d’ aler
mia amon nos ôtes (lès
“bons”). Si èle dimère durer
trwès mwès, on va l’ sinte
passer èt duvu dispinser ène
miète mwinsse tot payant
plus tchêr. Si Sadam s’
amûze (?) à fé durer l’
fièsse èt fé pèter totès lès
èmantchûres ki l’ Blix n’a
nén trové, on va riwêti à

deus côps po mète l’ auto
dsus l’ voye rapwârt au
costèdje do pètrole. Lès
mwârts ki ça va fé on n’ nos
è djôze nèrén. Lès va-t-on
conter à l’ pîce odobén a l’
rominne pèzêye ?

*

Dins lès noviatés
d’l’èdaume di 2003, i nos
faut fé nos complimints à
Lowi do Tchèri k’a mètu
dsus l’ arincrin dès paedjes
è walon. Alèz don vîre dsus
<http://www.courriaulx.net/>
si vos î rimètoz l’ cawète
“ sub4wa/in.html “ (à l’
adrèsse) vos alèz trover dèl
rèclame po dès djins k’ vos
conèchèz ène miète ☺

*

Tant k’vs èstèz dins lès
arincrinnesses ridaedjes,
fyoze don on distoû pa
www.kvbkb.be èt î trover l’
tièsse d’ène sakî k’on
s’dimande ck’ i pout bén fé
dins cit èmantchûre.

*

A l’ boûne vosse !

Parètréve k’ si vos bèvoz
dèl gote cink à chîj còp l’
samwinne vos n’ avèz k’
swèssante au cint d’
tchances d’ awvè ène sakwè
au coûr. Lès cias ki n’
bèvenut k’ à tanawète arîne,
zèls, cint tchances au cint !
Minme ki vos ploze flûter do
pèkèt, do wiski, vodka, rom
o cki vos chène bon à l’
astchéyance (mins nin
d’pus deus à trwès catis pa
djoûrnêye). Alèz, Mèlfiye,
rmètèz nos ça. C’ èst por mi
c’ còp ci. *Mins l’ bîre au
tonia rausse au cabarèt*.

*

L’ ôte djoû, Clèyante nos a
dit (à s’n’acostumance dins
l’ Swêr) k’ on s’ brouye si

on dit “vous mettez, nous suivrons” è françès. Li “**e**” a tchèyu fou ène miète après l’ XVIème sièke èt n’a dmèré k’dins l’prumêre condjugèzon. Pokwè don *stitchèréve-dj* co dins mès walons *scrîvaedjes* dès lètes ki d(i)mèrenut à todi moyates è m’botche (r(i)mètéz, s(i)titchèréve, s(i)crîvâdjes) ?

Kè dijèz-v’ lès *rfondeus* ?

*

C’ èst Bén d’ awè dèl pacyince mins i n’ fauréve nén k’ça dmère durer trop lontimps ! L’ dij-ût d’ awousse 1950 a stî tuwé Djulyin Lahaut dsus l’ soû di s’ maujhône. I xhèneréve ki, dispû 1977, on a trové ki l’ rèsponsâbe èstéve on djint di Hal èt k’dispû on n’a nén sayî d’è sawè pus lon ! L’ èst vraîy ki n’a nén stî l’ dêrin k’on dmère à co ratinde po sawè kwè...

*

Avoz mau vosse tièsse ? D’ après l’ mêde Bâhman Guyuron, d’ Cleveland, ça va fini si vos vos fyozez passer lès plis d’ vosse front èt l’rinde tot Bén lisse. Sins pus pont d’fronces dissu, tot vos ira au mia. Èsse pou çoula k’ tant d’ feumes dèl tèlè n’sont pus capâbes di moustrer dès sintumints ?

Si v’s’avèz l’ froyon odobén deûr à vos achîre, on n’ a nén co polu nos dire si on pout dèdjâ s’ ocuper dèl sacréye rôye...

*

On lomé Rayèl ki dit awè stî sakants còps s’ pormwirner au dila do cîr dins ène jate ritoûnèye l’

cou au wôt au mitan d’ ène profonde assiète; on lomé Rayèl ki dit awè stî djuner, dinner, riciner èt minme soper avou Djèhu, Moshè, Maomèt èt co Bouda; on lomé Rayèl ki s’ dit mërsoçon dès Èloims, d’ après li, grands cougneus di nos ratatayones do vî-vî tims d’avant lès grandès eûwes; on lomé Rayèl s’ a vanté d’ awè dèdja fé dès clonnaedjes di crapôdes èt d’ valèts. L’ aroke c’ èst ki n’ èst nén d’ acwârd po k’on î riwète di près po vîre si n’nos raconte nén dès crakes. C’ èst cauzu shûr k’i nos coyone. Après tot, si lès Èloims s’ sont Bén atavlés avou li, après lès waufes, l’ jate di cafeu èt l’ pitite gote ki va avou, l’ *Bob-Eloim* ki l’ a ramwinrné aréve Bén polu, rivnu insi dsus place, î aler d’on ptit còp d’ boutaedje. Avou l’ tims



k’a passé, nos bauchèles ont tot d’ minme gangnî è biaté èt il aréve polu trover à s’

goût. Nonna ? Nén co amon nos ôtes èwousk’ il aréve dès acwintances ?

*

L’ Nordisse Corêye vouréve djouwer cink royas èt rapontiyî sès atomikes gayoles. Parèt ki n’ sont nén prèssî d’ mète dès èyolines à l’ place. C’ èst l’ vraîy k’ on molin à vint, minme pa tims d’ grossès bîjes, n’ a mây èvoyî lon ène sakwè ki rixhène a ène fusêye. Parètréve k’ on a sondjî a vèla rèvoyî nosse Lome Burdjon – k’a Bén d’ l’ agrès po zèls - po sayî d’ arindjî lès bidons. Ptète k’avou ène novèle banslêye d’ flates èt ène risêye au ptits djonnes ?

*

I gn’a dèdja sakants mwès, dins TOUDI on lîjéve ki l’ Walonîye *sèrève iène dès pus ritchès rèdjons d’ France*. Minme k’ èle î purdréve li cinkyinme place. Èt si on l’ mètéve dsus lès scayons dèl chaûle di l’ Urope ? Dins lès novias ki font Bén rade s’î aclaper, i gn’a l’ Èstonîye. Sondjèz k’ avou sès 1.300.000 djints (ddins 40 au cint d’ russofones) i vont fé l’ balance amon nos ôtes avou li Hènâ ! Bon, on a mwinsse di bwès k’ zèls, mins on a Van Cau èt Di Rupo po nos richandi ☺...

*

Si, à l’ astchèyance, vs’ avèz dès rûjhes à nos Bén comprinde, s’ayèz d’ aler trover on èsplicaedje di nos mots

amon

<http://moti.walon.org>

*

L' timbe Prior dèl Posse-Posse (s'apinse L.Mahin) c'èst cauzu come lès pronostics Prior di ddins l' timps. On poléve fé dès crwès èt awè dès "cèrtitûdes" di gangnî. C' èstéve tot sovint parêy po l' pus grande masse k' î èstfne d'leû caurs bîfîs.

*

"Doné c'èst doné èt riprinde c' èst voler" k'on nos dijéve èl maujone, "mins kand on vos a prusté i vos faut rinde". Pokwè k' cès ratoûrnûres là nos trotenut è l' tièsse ? I gn'a Bén ène rêjon. Kwè ? 2 000 000 dijèz-v' ?

L' pinsèz-v' ? Au fond, c'èst ptète lès minmes k'on stî foutu l' ôte fiye pa on ôte dins l' feû ? Esseki ça n' vos chène nén on *prizunik* dins lès politikaedjryes ?

*

Pisk'on djôze di feû. L' ôte djoû, èl Taïlande, on ome a scroté on blindé camion plin d' caurs. Manke di tchance, i s'a fait prinde mins lès liârdès n' èstfne pus là. "Come i fiéve frèd, dji ls-a brûlé po m' rèstchaufé" a-t-i èspliké. Vêla, lès maupinsants dîjenut k'i 'nn'a mètu ène boune banslêye à iute po sès vîs djoûs...

*

L' Paris-Dakar, l' coûsse dins lès sauvlons, ct' anêye ci n' passe nén pa Dakar. Lès imaudjes k' on nos è done moustèrenut sovènt dès rèclames po lès Golwèsses. Kand lès coûsses di Francortchamp vont s'd'aler coru lon èri avou leû banslêyes d' rèclames po lès cigarètîs



comint èsse k'on va fé po k'on n' è profite nén lon èt laudje ?

*

Tant k'a vos cauzer d' fumaedjes. On n' nos dit rén, on nos muche tot mins tot fini pa s'fé sawè. Dispû 30 ans on profèsseû d' univèrsité Swisse boutéve dsus lès riskes di maladyes ki lès èfants d' fumeûs ont. L' aroke c'èst k' dispû l' minme nombre d' anêyes il èstéve payî pa Flup Moris (ki fabrike dès totes cozeûwes) po n'nén trop fé di mwêjès discoviètes èt d' Bén nèyî l' fumêre tot saûrant lès pèxhons.

*

TCHOFILÉ S'ADOUVE

(On vos avéve dèdjâ fé fait conxhance avou li è 2001 à la paedje 70)

Achîd dins on vî fautule au culot do feû, minme après sakants gotes di stronnées, on n'dwât nén si Bén k' ça. I n'a nén falu k' Tchofile ranche branmint dins sès

clikotias à l' pikète do djoû po k'dji dove on ouy èt l' riwêfî. D'on brès il a disgadji ène cwane dèl taûve èt î mète deus grandès jates. Il a aurdé dvant li l'pus chaurdée èt chofler deus côps dins l' ôte po z' è fé rèxhe kékes blancs plomions k'ont volé dins l' lumêre do kinkèt. Il a vnu grawî èt rikèrdji li stûve avou deus trwès bokèts d'bwès èt dès brêzètes. L' machurêye cokmwâre n'a nén ratindu lontimps po tchanter. Il a tapé on ouy dins l' ramponau, î passer on dwèt djani pa l' nicotine èt, d' azârd s'dijant k'c'èstéve come bon po on côp, l'a rmètu dsus l' caftîre èt î fé coler l' bolante euwe. L'cafeu sièrvu, i m'a Bén falu l' bwâre. Après tot, ènn'don, kand on a conchu l' guêre... "Non mèrci, li a-dj' tot d' minme dit kand il a volu m'è risièrvu iène, dji n' seû nén on grand cafeteu." M' vinte grûlêve mins quand dj'a vèyu, dsus on bokèt d' gazète, l' vî rassètchî mitan d' pwin, dji m'a dit k'il èstéve timps d'fé rédjime. Tchofile, ki s' avéve fait ène potêye di deus tayas di pwin è bokèts èt do suke di pot, mandjéve à plins kilîs. S' jate vûde, i s'a choûrbu lès lèbes èt m' dîre : - Dji n'a mây conté comint Mardjo m'a kité. A vos dj'èl va Bén dîre. "S' èstéve on ût di djanvî. L' nût èstéve frède. Come di djusse li tchambe n' èstéve nén tchaufée. Si on s' sièrvéve do pot d' chambre - èt, pris dèl prostate, s' èstéve pus

sovint k'a m' tou - au matèn l' pichate î èstève èdjalée. Èviè mènût, Bén racamuchîye padzo lès covèrtes èt l' courtèpwinte, Mardjo a ronfèlé drole, come si s'stronnant. A mitan dispièrté, dji m'a touné dsus place èt, sins l' volu, m'mwin a djondu si ddrî, li pia di s'ddri. S'tchimisse di nût d' couti s' avéve wôt rimonté. Èle ni s'a nin raculé come à s' n' ûzance di branmint d' anêyes èt mès dwèts di doûcemint s' ènonder à l' carèssî, passer dsus l' crau dèl cwisse, dischinde l' long d'sès grèvès èt rimonter davin-davau djuk'a s'n' antche. Dji n'î sintéve pont d' grumias, s' pia divnéve, come dins nosse djonne timps, ossi doûce ki dèl swè tot s' richandichant dizo mès florâdjès. Mardjo n' ronfèléve pus èt rèspiréve paujèrmint. Èle a come guinwî ène miète kand, après awè trèvautchî s' costé, dj'a aspagnî si spale èt l' carèssî. Dzo l' tchimisse, mès dwèts ont dischindu li skine, rifter d'leû dos l' rôye dès fèsses, florer l' fonzée èt s' avaler djusk'aus ggnos, rimonter, ridischinde sins s' nauji, sins pus sawè s' djoker. Tot sospirant, Mardjo s'a cotwardu, s' glissî d'sus s'dos èt sitinde sès djambes. Mès dwèts, assatchîs pa l' tchaleûr do choû, ont cotoûrné l' boutroule, adonpwis s' afranchi a griper èt djonde li pwètrène, wazu l' apougnî èt prèssî lès grins d'on flitchî

mamuron k'a gonfèlé d' cauzu deus cintimètes èt deuri. Mardjo a djèmi. M' mwin a kandjî d' tête èt î djouwer tot parêy li cramignon. Mardjo a ahané. Dès pititès grawèes si chûvine dus s'pia. M'mwin a ridischindu, l' vinte, li boutroule, li choû, lès cwisses, lès ggnos, lès gravèes èt pigote à migote rimonter, èt pwis ridischinde, èt rimonter, co ridischinde, passer oute èt, rivnus à l' fraze, prinde li timps d'î discomèler lès croles. Î lèyant Poûcèt, Laridèt s'a sitindu dsus l' crèvaude, distinde li craye èt s'î muchî. Discalfi, l' pèpion, d' sovance, s'a rècrèsté. Kékes munutes d' kèkiyâdje à l' dèfacer èt l' fé radeuri... l' mozète a triyané, Mardjo a rauki, s' a ècruké, sèrer sès cwisses à m' broyî m'mwin, s' dislachî, s' touner à intche èt, sins moufter, tot anslant, lèye ki n'avéve mây sitî glote dès cougnaedjes, s'racapoter dsus li ptit bouneûr rimonté d'bén lon dins l' timps. Mi, ki n'avéve pont d' flou à ratinde d'on rûni cranchu èdia, pus rin à polu cowêter d'mès cozins, dji m'a touné dsus m' drwèt costé, m'mwin èstève frèchîye pa ène miète di chume. Tèvozé, i

m'chène co è ritrover l' sinteu. Li lèdmwin, Mardjo èstève tote frède dsos l' linçoû avou on drole di ptit sorîre dsus sès lèbes. L' docteuûr Hans k'a vnu po signî lès papîs rèkis po l' ètèrmint a sori èto tot m' dijant "Èle a sofru d' Bén dès maus dins s' vikêrîye mins dji pinse k' èle a yeu ène bèle mwârt."

Tchofile a spotchî ène clére pièle ki lî comincéve a rider dsus s' massale èt s' lèvant d'dîre "Alèz, dji m'va vos ramwinrner à vosse auto, ça va ranêri mès eskiyons." V'loz comprinde ki c'djoû là, rintré à m' maujone, dji n'a wêre fait di bon come ovrâdje ? Dins m' sovance, l' dêrin còp k'dj' avéve vèyu

Mardjo
èle
avéve
dèdjâ
dins lès
katrè-
vints
ans..

*

**On va
bén rade
nd'aler**

voter. (Dj-ût di may) Nosse Minisse di Prèsidint a, li, dècidé di n'nén pus s'mète dsus lès lisses.

*

